

Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat

Aalisarnek pillugu Inatsisartut inatsisaanni nr. 18, 31. oktober 1996-imeersumi, kingullermik Inatsisartut inatsisaatigut nr. 28, 28. november 2016-imeersukkut allanngortinneqartumi, § 8, imm. 2, § 9, imm. 1, § 10, § 10a, § 10b, imm. 1, § 11, imm. 1-2, § 13, imm. 2-3, § 14, imm. 5, § 21, imm. 2, § 24, § 33, imm. 2, § 34, imm. 3 aamma § 38, imm. 3 malillugit aalajangersarneqarpoq:

Atuuffia

§ 1. Nalunaarut

- 1) angallatit Kalaallit Nunaanni nalunaarsorsimasut,
- 2) angallatit nunanit allaneersut imartani Kalaallit Nunaata aalisarnikkut oqartussaaffigisaani, imaluunniit
- 3) angallatit nunanit allaneersut imartani Kalaallit Nunaata aalisarnikkut oqartussaaffigisaasa avataanni Kalaallit Nunaata pisassaanik aalisartut, atorlugit inuussutissarsiutigalugu aalisarnermut atuuppoq.

Imm. 2. Tamatuma saniatigut nalunaarut atuuppoq inuussutissarsiutigalugu aalisarsinnaanermut akuersissuteqarnissamik piumasaqaatitaqarfiusumut.

Imm. 3. Nalunaarut naapertorlugu aalisarsinnaanermut akuersissummik tunineqarsinnaanissamut piumasaqaataavoq, qinnuteqartup inuussutissarsiutigalugu aalisarnermik imaluunniit aalisarsinnaanermut akuersissuteqarfigineqarsimanissamik piumasaqaatitaqarfiusumik ingerlataqarnissaa.

Imm. 4. Angallatit usitussutsimut uuttuutaat malillugu 75 BRT imaluunniit 120 BT-mit mikinerusut taamaallaat imartami sinerissap tunngaviusumillu titarnerup aalisarnikkut oqartussaaffiup killingata 3 sømilit avataanniittup akornanni aalisarsinnaapput, taamaattorli imm. 6 aamma 7 takukkit.

Imm. 5. Angallatit usitussutsimut uuttuutaat malillugu 75 BRT imaluunniit 120 BT-tut angitigisut anginerusullu taamaallaat titarnerup aalisarnikkut oqartussaaffiup tunngaviusumik killingata 3 sømilit avataanni aalisarsinnaapput, taamaattorli imm. 7 takujuk.

Imm. 6. Imm. 4 saattuarniarnermi atuutinngilaq.

Imm. 7. Raajarniarsinnaatitaaneq Imartani Kalaallit Nunaata aalisarnikkut oqartussaaffigisaani raajarniarnek pillugu Namminersornerullutik Oqartussat nalunaarutaanni nr. 23-mi, 29. august 2002-meersumi malittarisassaqaartinneqarpoq.

Imm. 8. Imm. 4 aamma 5 uiluinniarnermi atuutinngillat.

Nassuiaatit

§ 2. Nalunaarummi matumani “usitussutsimut killigititaq” paasineqassaaq usitussutsit angallatip uuttuutaanut uppersaammi allassimasutut, uuttueriaatsit pillugit malittarisassat sorliit tunngavigalugit usitussutsimut uuttuutit suliarineqarsimanerat apeqqutaatinngu.

Imm. 2. “Qaammatisiutit ukiuat qaangiuttoq” paasineqassaaq qaammatisiutit ukiuattut aalisarsinnaanermut akuersissummut qinnutigineqartumut qaammatisiutit ukiuata piffissap akuersissuteqarfiusup aallartiffiata siuninnguaniittut.

Imm. 3. “Taamaaqataanik aalisarsinnaanermut akuersissut” paasineqassaaq nunap immikkoortuanut tassunga aalisariutip aalisarsinnaanermullu akuersissutip suussusianut tassunga akuersissutitut.

Imm. 4. “Umiatsiaaraq” paasineqassaaq angallatitut sugaluartutulluunniit 6 meteritut taannaluunniit ataallugu tamakkiisumik takissusilittut.

Imm. 5. “Aalisarneq aalisarsinnaanermut akuersissuteqarnissamik piumasaqaatitaqarfiusoq” paasineqassaaq aalisarnertut inuussutissarsiutigalugu aalisarnerunngitsutut, aalisarsinnaanermut akuersissuteqarnissamut piumasaqaatitaqarfiusutut.

Piffissaa killilerlugu aalisarsinnaanermut akuersissut pisassat annertunerpaaffilerlugit

§ 3. Piffissaa killilerlugu aalisarsinnaanermut akuersissut, tassunga pisassat annertunerpaaffilerneqarsimatillugit, inuussutissarsiutigalugu aalisarsinnaanissamut piumasaqaataavoq:

1) angallatit 75 BRT/120 BT-tut angitigisut anginerusullu aamma angallatit 6 meteritut tamakkiisumik takissusillit atorlugit raajarniarneq sinerissamullu qanittumi qaleralinniartut ilanngunnagit,
2) uiluinniarnermi, angallatit angissusaat apeqqutaatinngagit aamma
3) aalisarneq pillugu oqartussaaffinni nunat allat imaluunniit nunarsuup immikkoortuini aalisarneq pillugu suleqatigiiffit aalisarnermik killilersuisinnaanermut pisinnaatitaaffigisaanni angallatit Kalaallit Nunaanni nalunaarsorneqarsimasut atorlugit aalisarnermi.

Imm. 2. Piffissaa killilerlugu aalisarsinnaanermut akuersissut, tassunga pisassat annertunerpaaffilerneqarsimatillugit, taamatuttaaq nunat tamalaat imartaanni malittarisassaqaartitsiviuunngitsuni inuussutissarsiutigalugu aalisarnissamut piumasaqaataavoq.

Imm. 3. Aalisarsinnaanermut akuersissummik tunniussinermi aalisagaqatigiinnut pisassiissutinik aalajangersaanermi pineqartunik naliliineramik, qinnuteqartut tamarmiusut amerlassusiinik § 12-ilu naapertorlugu Naalakkersuisut agguaaasinermi piumasaqaataanik tunngaveqassaaq.

Imm. 4. Aalisarnerni aalisagaqatigiinnik arlalinnik ataatsikkut pisaqanngitsoorfusinnaanngitsuni aalisagaqatigiit ataasiakkaat iluaqutiginiarneqarsinnaanerat isiginiarlugu tamanna akuerineqarsinnaappat aalisagaqatigiinnut taakkununga tamanut pisassiissutinik aalisariut tunineqassaaq.

Imm. 5. Aalisarsinnaanermut akuersissut ukiut pisassiiviusut ataasiakkaarlugit tunniunneqartarput. Uumassusilerisut siunnersuinerat ukiunut pisassiiviusunut arlalinnut atuuppat aalisarsinnaanermut akuersissummik ukiunut pisassiiviusunut arlalinnut atuuttumik tunniussisoqarsinnaavoq.

Piffissamut killilikkamut aalisarsinnaanermut akuersissut pisaqarsinnaasut annertunerpaaffilernagit

§ 4. Piffissaa killilerlugu pisassat annertunerpaaffilernagit aalisarsinnaanermut akuersissuteqarnissaq ukuninnga inuussutissarsiutigalugu aalisarnermi piumasaqaataavoq:

1) aalisagaqatigiinnik, angallatinit Kalaallit Nunaanni nalunaarsorneqarsimasunit ataatsimoorullugu

aalisarneqarsinnaasunik pisassiisoqartillugu aalisarnermi,

2) immikkut pisoqarnerani uumassusilerisut siunnersuinerat pisassiissutininik aalajangiinissamik kinguneqartussaatinagu angallatit Kalaallit Nunaanni nalunaarsorneqarsimasut atorlugit aalisarnermi, aamma

3) angallatit nunanit allaneersut atorlugit Kalaallit Nunaata aalisarnikkut oqartussaaffigisaani aalisarnermi, aalisakkanik pisassiissutit nunap erfalasoqarfusup pineqartup angallataanit ataatsimoorullugit aalisarneqarsinnaatillugit.

Imm. 2. § 4, imm. 1, nr. 1 aamma 2 malillugit aalisarsinnaanermut akuersisummik tunniussineq piumasaqaatit § 8-mi aalajangersarneqarsimasut tunngavigalugit pisassaaq.

Imm. 3. § 4, imm. 1, nr. 3 naapertorlugu aalisarsinnaanermut akuersisummik tunniussineq nunat tamalaat isumaqatigiissutaat tunngavigalugit pisassaaq.

Imm. 4. Aalisarsinnaanermut akuersissut ukiut ataasiakkaarlugit tunniunneqartarput. Uumassusilerisut siunnersuinerat ukiunut arlalinnut atuuppat aalisarsinnaanermut akuersisummik ukiunut arlalinnut atuuttumik tunniussisoqarsinnaavoq.

§ 5. Umiatsiaaqqat 6 meteritut tamakkiisumik takissusillit mikinerusulluunniit atorlugit inuussutissarsiutigalugu aalisarnermi piffissaakillilerlugupisassat annertunerpaaffilernagit aalisarsinnaanermut akuersisummik peqarnissaq piumasaqaataavoq.

Imm. 2. § 8 aamma § 10 tunngavigalugit aalisarsinnaanermut akuersissutininik tunniussisoqartarpoq.

Piffissamut killiligaanngitsumut aalisarsinnaanermut akuersissut pisarineqarsinnaasut annertunerpaaffilerlugit

§ 6. Angallatit 6 meter sinnerlugu tamakkiisumik takissusillit atorlugit raajarniarnermi sinerissamullu qanittumi qaleralinniarnermi piffissamut killiligaanngitsumut pisarineqarsinnaasut annertunerpaaffilerlugit akuersisummik peqarnissaq piumasaqaataavoq.

Imm. 2. Piginnittup pisassiissutinit pigisai aalisarsinnaanermut akuersisummi allassimassapput. Pisassiissutinit pigisat tassaapput pisassiissutit tamarmiusut imartami pisassiiffiusumi aalisagaqatigiinnik pineqartunik Naalakkersuisut aalajangersarsimasaasa procentinngorlugit ilaat.

Imm. 3. Piffissamut killiligaanngitsumut aalisarsinnaanermut akuersisummut atatillugu ukiut tamaasa ukioq pisassiiffiusoq aallartitsinnagu ukiumoortumik pisassiissutit pillugit nalunaarut tunniunneqassaaq, ukiumi pineqartumi annertussutsit tunisassiornissamullu akuersissutaajunnartut nalunaarlugit.

Pisassiissutininik nuussineq

§ 7. Raajarniarnermi qaleralinniarnermilu aalisariutaatileqatigiiffik ukiumoortumik pisassiissutininik tamakkerlugit aalisarsimasoq qinnuteqartoqarneratigut ukiumi pineqartumi novembarip ulluisa 15-iata kingornatigut aalisarnermik ingerlatitseqqinnissaminut akuerineqarsinnaavoq. Ukiumoortumik pisassiissutit saniatigut pisarineqartut annertussusii ukiup tulliani aalisariutaatileqatigiiffimmut ukiumoortumik pisassiissutigineqartunit ilanngaatigineqassapput.

Imm. 2. Raajarniarnermi qaleralinniarnermilu aalisariutaatileqatigiiffiup ukiumoortumik pisassiissutininik tamakkerlugit aalisarsimanngitsup qinnuteqartoqarneratigut ukiup siuliani pisarineqanngitsut amerlaqataannik ukiup tulliani ukiumoortumik pisassiissutit amerlineqarnissaannik akuerineqarsinnaavoq.

Pisassiissutit nuunneqartut eqqarsaatigalugit raajat kingusinnerpaamik aprilip ulluisa 30-anni pisarineqarsimassapput qalerallillu kingusinnerpaamik juulip aallaqqaataani pisarineqarsimassallutik.

Imm. 3. Imm. 1 malillugit qinnuteqaat Aalisarnermut, Piniarnermut Nunalerinermullu Naalakkersuisoqarfimmut nassiunneqassaaq. Qinnuteqaat imm. 1-2 naapertorlugit aalisarnerup nangeqqikkusunneqarnera kingusinnerpaamik sapaatit akunnerinik marlunnik sioqqullugu Naalakkersuisoqarfimmit tiguneqareersimassaaq.

Imm. 4. Imm. 1-2 malillugit ukiumut pisassiissutit nuunneqartut aalisarneqassapput aalisartitsiveqatigiiffimmiit aalisartumilluunniit, nuussisitsisimasunit ukiumut pisassiissutininik.

Imm. 5. Qalerallit ukiumut pisassiissutit nuunneqarnikut tamakkerlugit aalisarneqanngippata 1. juli kingorna, takuuk stk. 2, Naalakkersuisut agguaqqissinnaapput ukiumut pisassiissutit sinerissamut qanittumi angallatit umiatsiaaqqallu akornanni, pisassiivimmi 47-mi.

Sinerissamut qanittumi aalisarnermi aalisarsinnaanermut akuersissutininik tunniussisarneq

§ 8. § 4, imm. 1, nr. 1-2 aamma § 5 tunngavigalugit aalisarsinnaanermut akuersissutit, qinnuteqartunut ukiup siuliani assinganik aalisarsinnaanermut akuersissuteqarsimasunut tunniunneqartarput, taamaattorli § 10 takujuk.

§ 9. Umiatsiaaqqamik sinerissamut qanittumi aalisarsinnaanermut akuersissummik qinnuteqaat kommunimi qinnuteqartup najugaqarfigisaani kommunalbestyrelsimut tunniunneqassaaq. Qinnuteqartut qinnuteqarnermi immersuivissaq www.sullissivik.gl-imi nassaarineqarsinnaasoq atussavaat.

Imm. 2. Angallatit 6 meter sinnerlugu tamakkiisumik takissusillit atorlugit sinerissamut qanittumi aalisarsinnaanermut akuersissummik qinnuteqaat Aalisarnermut, Piniarnermut Nunalerinermullu Naalakkersuisoqarfimmut tunniunneqassaaq. Qinnuteqartut qinnuteqarnermi immersuivissaq www.sullissivik.gl-imi nassaarineqarsinnaasoq atussavaat.

§ 10. Qinnuteqartoqarneratigut Aalisarnermut, Piniarnermut Nunalerinermullu Naalakkersuisoqarfik qinnuteqartunut makkununga § 8-mi piumasaqaatip sanioqqunneqarnissaanut akuersissuteqarsinnaavoq:

1) Qinnuteqartunut 18-it 29-illu akornanni ukiulinnut imarsiornermi aalisarnermik ilinniagaqarsimasunut, imaluunniit allatigut taamaaqataanik piginnaasaqalersimasunut.

a) Inuussutissarsiutigalugu piniarteq taamaaqataanik aamma piginnaasaqalersinnaavoq imm. 1-ilu naapertorlugit qinnuteqarsinnaalluni.

2) Qinnuteqartup allatigut taamaaqataanik piginnaasaqalersimanera innersuussutigalugu qinnuteqartoqarpat, tamanna ukunannga uppersarsarneqarsimassaaq:

a) Kommune angerlarsimaffigisaq.

b) Kattuffik attuumassutilik.

c) Inuk pineqartup aalisaqatigisimasaa.

Imm. 2. Pineqartup inuussutissarsiutigalugu umiatsiaaraqarnissaa pisariaqartunillu aalisarnermut atortoqarnissaa immikkut akuerineqarsinnaanissamut piumasaqaataavoq. Tamatuminnga qinnuteqaat Aalisarnermut, Piniarnermut Nunalerinermullu Naalakkersuisoqarfimmut nassiunneqassaaq. Imarsiornermik ilinniagaqarsimanermut uppersarsaat allatigulluunniit uppersarsaatit ilanngussatut

nassiunneqassapput.

Imm. 3. Immikkut akuersissuteqarnermi sumiiffimmut pineqartup najugaqarfigisaanut aalisarsinnaanermut akuersissummik tunniussisoqassaaq.

Imm. 4. Aalisarnermut, Piniarnermut Nunalerinermullu Naalakkersuisoqarfik taamatuttaaq sumiiffinni Qaanaami, Tunumi, Kujataanilu, suliffeqarnissamut allanik periarfissaqanngitsoq nalilerneqarpat, qinnuteqartunut immikkut akuersissuteqarsinnaavoq. Immikkut akuerineqarnissamik qinnuteqaat Aalisarnermut, Piniarnermut Nunalerinermullu Naalakkersuisoqarfimmut nassiunneqassaaq.

Imm. 5. Aalisarnermut, Piniarnermut Nunalerinermullu Naalakkersuisoqarfik qinnuteqartunit akuerineqarluni § 10, imm. 1-2 aamma 4-mi naliliinernut atugassanik kommunimit qinnuteqartup angerlarsimaffigisaanit najukkamilu aalisartut piniartullu peqatigiiffiannit qinnuteqartoq pillugu paasissutissanik pisariaqartunik pissarsiniarsinnaavoq.

Avataasiorluni aalisarnermi aalisarsinnaanermut akuersissutinik tunniussisarneq

§ 11. Avataasiorluni aalisarnermut aalisarsinnaanermut akuersissummik qinnuteqaat Aalisarnermut, Piniarnermut Nunalerinermullu Naalakkersuisoqarfimmut tunniunneqassaaq. Qinnuteqartut qinnuteqarnermi immersuivissaq www.sullissivik.gl-imi nassaarineqarsinnaasoq atussavaat.

§ 12. § 3, imm. 3 naapertorlugu pisassiissutinik agguaassineq makkuninnga atugassaqtitsilluni pissaaq:

- 1) Pisassiissutit siullermik aalisariutaatileqatigiiffinnut ukiuni siusinnerusuni taakkuninnga pisassaqaarsimasunut agguaanneqassapput.
- 2) Imm. 1, nr. 2 naapertorlugu agguaassereernerup kingorna pisassiissutit sinneqassagualarpata, taakku siullermik aalisariutaatileqatigiiffinnut pioreersunut allanut amerlanerusunik pisassaqaarsinnaanermik pisariaqartitsinnaasunut agguaanneqassapput.
- a) Imm. 1, nr. 2 naapertorlugu pisassiissutit agguaanneqarneranni pisassiissutit nalingi aallaavigineqassapput, taamatullu aamma siullermik aalisariutaatileqatigiiffit aningaasaqarniarnikkut imminnut napatissinnaanerisa qularnaarneqarnissaa, kiisalu aalisariutaatileqatigiiffit pioreersut akornanni nalilit naliiginnerusumik agguataarneqarnissaat isiginiarneqassallutik.
- 3) Aalisariutaatileqatigiiffinnut nutaavinnut pisassiisoqassanngilaq, taakku ukioq ilivitsoq aningaasaqarniarnikkut imminut napatissinnaasumik aalisarsinnaanissaat qularnaarneqarsinnaanngippat.

Inuussutissarsiutigalugu misileraalluni aalisarsinnaanermut akuersissut

§ 13. Inuussutissarsiutigalugu misileraalluni aalisarsinnaanermut akuersissummik qinnuteqaatit Naalakkersuisunit akuerineqartassapput.

Imm. 2. Naalakkersuisut inuussutissarsiutigalugu misileraalluni aalisarsinnaanermut akuersissutinik pilersitsillutillu agguataarisarput.

Imm. 3. Inuussutissarsiutigalugu misileraalluni aalisarsinnaanermut akuersissummik qinnuteqaatit Naalakkersuisunut saqqummiunneqarsinnaalertigatik Aalisarnermut, Piniarnermut Nunalerinermullu Naalakkersuisoqarfimmut nassiunneqartassapput.

§ 14. Inuussutissarsiutigalugu misileraalluni aalisarsinnaanermut akuersissummik qinnuteqaat Aalisarnermut, Piniarnermut Nunalerinermullu Naalakkersuisoqarfimmut tunniunneqassaaq. Qinnuteqartut qinnuteqarnermi immersuivissaq www.sullissivik.gl-imi nassaarineqarsinnaasoq atussavaat.

Imm. 2. Qinnuteqaatit ataasiakkaat erseqqinnerusumik nalilerneqareernerisigut aalisarsinnaanermut akuersissutit tunniunneqarsinnaapput, tamatumani piumasaqaatit uku pingaartinneqassallutik:

- 1) Qinnuteqartoq pisariaqartinneqartunik piginnaaneqarnersoq.
- 2) Siunertarineqartoq sapinngisamik pitsaanerpaamik naammassineqarsinnaaqullugu qinnuteqartoq inuussutissarsiutigalugu misileraalluni aalisarnissaminut naleqquttumik angallateqarnersoq aamma pisariaqartinneqartunik atortussaqaarnersoq.
- 3) Aalisakkanut qinnuteqaatigineqartunut atorneqartussat inuussutissarsiutigalugu misileraalluni aalisarnerq naammassisinnaaneraat.
- 4) Qinnuteqartup angallataa pigineqarnermigut Kalaallit Nunaanni angerlarsimaffeqarnersoq.
- 5) Aalisakkat pineqartut, imartap pineqartup, atortulersuutit teknologiillu misissuiffigineqarnissaat ilumut pisariaqartinneqarnersoq.
- 6) Imaani uumasogatigiinnik Pinngortitaleriffup naliliinera.

Imm. 3. Inuussutissarsiutigalugu misileraalluni aalisarsinnaanermut akuersissut piffissamut killiligaavoq pisarineqarsinnaasullu annertunerpaaffissaligaanerannik ilaqaarluni.

Imm. 4. Aalisarsinnaanermut akuersissut ukiut pisassiiviusut ataasiakkaarlugit tunniunneqartarpoq.

§ 15. Aalisarnermut, Piniarnermut Nunalerinermullu Naalakkersuisoqarfik aqutsiveqarfinni aalisagaqatigiinnik pisassiissutigineqanngitsunik inuussutissarsiutigalugu misileraalluni aalisarsinnaanermut akuersissuteqarsinnaavoq.

Imm. 2. Aqutsiveqarfinni atuuttuni alisagaqatigiinnut pisassiissutaareersunut inuussutissarsiutigalugu misileraalluni aalisarnissamut, Aalisarnermut, Piniarnermut Nunalerinermullu Naalakkersuisoqarfiup Pinngortitaleriffik isumasioqatigalugu tamatumunngapisariaqartitsisoqartoq isumaqarpat, immikkut akuersissummik tunisisoqarsinnaavoq.

§ 16. Qinnuteqartut Aalisarnermut, Piniarnermut Nunalerinermullu Naalakkersuisoqarfimmit akuerineqarlutik inuussutissarsiutigalugu misileraalluni aalisarnerup ingerlanneqarnissaanut nunat allamiut angallataannik attartorsinnaapput, kalaallit angallataanni atortussat pisariaqartinneqartut imaluunniit teknologi pisariaqartinneqartoq pigineqanngippata.

Aalisarnerq aalisarsinnaanermut akuersissuteqarnissamik piumasaqaatitaqarfusoq

§ 17. Aalisarnermut aalisarsinnaanermut akuersissuteqarnissamik piumasaqaatitaqarfiusumut aalisarsinnaanermut akuersissummik qinnuteqaat Aalisarnermut, Piniarnermut Nunalerinermullu Naalakkersuisoqarfimmut tunniunneqassaaq.

Imm. 2. Aalisarnermut aalisarsinnaanermut akuersissuteqarnissamik piumasaqaatitaqarfiusumut pineqartumut piumasaqaatit atugassarititaasullu qinnuteqartup aammassisimassavai.

Imm. 3. Aalisarnerq inuussutissarsiutigalugu aalisarnerunngitsoq aalisarsinnaanermullu akuersissuteqarnissamik piumasaqaatitaqarfusoq tassaavoq sunngiffimmi kapisilinniarneq.

Imm. 4. Sunngiffimmi kapisilinniarneq Namminersorlutik Oqartussat kapisilinniarneq pillugu nalunaarutaanni malittarisassaqartinneqarpoq.

§ 18. Saarullinnik tunisaqarnissaq siunertaralugu sunngiffimmi aalisarsinnaanermut akuersissummik qinnuteqarnermi qinnuteqarnermi immersuivissaq www.sullissivik.gl-imi nassaarineqarsinnaasoq atorneqassaaq. Qinnuteqarnermi piumasaqaatit makku naammassineqarsimassapput:

- 1) Qinnuteqartoq Kalaallit Nunaanni najugaqartutut inuit nalunaarsorsimaffianni nalunaarsorsimassaaq ukiunilu qaangiuttuni kingullerni marlunni Kalaallit Nunaanni najugaqartutut nalunaarsorneqarsimassalluni.
- 2) Qinnuteqartoq Kalaallit Nunaanni tamakkiisumik akileraartussaataaassaaq qaammatisiutillu ukiuni qaangiuttuni kingullerni marlunni Kalaallit Nunaanni tamakkiisumik akileraartussaataasimassalluni.
- 3) Qinnuteqartoq inuussutissarsiutigalugu aalisartuussanngilaq.
- 4) Aalisarsinnaanermut akuersissut tunniunneqarsimasooq tunitsivimmi takutinneqartassaaq.
- 5) Immersugassat tamarmik erseqqissumik atuaruminartumillu immersorneqarsimassapput.
- 6) Sunngiffimmi aalisartutut aalisarsinnaanermut akuersissutillutut saarullinnik tunisineq taamaallaat pisinnaavoq inuussutissarsiutigalugu aalisartut tunisisinnaanerannik unitsitsisoqarsimatinnagu.

Tamanut tunngatillugu aalajangersakkat

§ 19. Aalisarnermut, Piniarnermut Nunalerinermullu Naalakkersuisoqarfik aalisarsinnaanermut akuersissutinik tunniussinermi piumasaqaatinik atugassarititaasunillu aalajangersaasinnaavoq.

Imm. 2. Akuersissutinik tunniussinermi piumasaqaatinik atugassarititaasunillu unioqqutitsineq inerteqqutaavoq.

§ 20. Aalisarsinnaanermut akuersissut taassumaluunniit assilinqarnera aalisarnerup nalaani angallammiitinneqassaaq. Taamatuttaaq ukiumoortumik pisassiissutinik nalunaarut taassumaluunniit assilinqarnera aalisarnerup nalaani angallammiitinneqassaaq.

§ 21. Aalisarsinnaanermut akuersissut piginnittumut aalajangersimasumut ataatsimut tunniunneqartarpoq, akuersissummilu angallat angallatilluunniit aalisarnermut atorneqartussat nalunaarneqarsimassallutik. § 6, imm. 1 naapertorlugu piffissamut killiligaanngitsumut aalisarsinnaanermut akuersissummut atatillugu ukiumoortumik pisassiissutinik nalunaarummi angallatit nalunaarsimassapput.

Imm. 2. Angallatit akuersissummi nalunaarneqarsimasut kisiisa atorlugit aalisarnerup ingerlateqqusaavoq. § 6, imm. 1 naapertorlugu piffissamut killilerneranngitsumut aalisarsinnaanermut akuersissummut atatillugu, angallatit akuersissummi ukiumulluunniit pisassanik nalunaarummi nalunaarneqarsimasut kisiisa atorlugit aalisarnerup ingerlateqqusaavoq.

Imm. 3. Taamaattoorli ATV-t, qimussit qamuteralaaq imm. 2-mi malittarisassanut ilaatinneqanngillat inuussutissarsiutigalugu aalisarnermi atorneqarsinnaallutik.

Imm. 4. Angallatit 6 meter sinnerlugu tamakkiisumik takissusillit atorlugit inuussutissarsiutigalugu aalisarsinnaanermut akuersissut atorlugu aalisarnermi umiatsiaaqqat atorneqaqqusaanngillat. Oqaaseqatigiinni siullerni inerteqqut bundgarnersornermi imaluunniit inuussutissarsiutigalugu nipisanniarnermi atuutinngilaq.

Imm. 5. Umiatsiaaqqamik inuussutissarsiutigalugu aalisarsinnaanermut akuersissut atorlugu aalisarnermi angallatit 6 meter sinnerlugu tamakkiisumik takissusillit atorneqaqqusaanngillat.

Imm. 6. Akuersissummi allannguutit, tassunga ilanngullugit piginnittuunermi pissutsit allanngorneri, Aalisarnermut, Piniarnermut Nunalerinermullu Naalakkersuisoqarfimmit akuerineqartassapput.

Imm. 7. Angallatip takissusia nalornissutigineqarpat Aalisarsinnaanermut Akuersissutininik Nakkutilliisoqarfik nutaamik uuttortaasoqarneratigut tamanna pillugu aalajangiissaaq.”

§ 22. Inuk ingerlatseqatigiiffilluunniit peqatigitillugu angallammut 6 meter taannaluunniit inorlugu tamakkiisumik takissusilimmut aamma angallammut 6 meter sinnerlugu tamakkiisumik takissusilimmut aalisarsinnaanermut akuersissutininik pigisaqarsinnaanngilaq.

Imm. 2. Angallat 6 meter sinnerlugu tamakkiisumik takissusilik motooriarsimanerup, amutsivimmiinnerup sikuunerataluunniit kinguneranik ingerlanngippat, angallammut tassunga aalisarsinnaanermut akuersissummik piginnittoq, piffissami angallatip motooriarsimanerani, amutsivimmiinnerani sikuuneraniluunniit, angallammik 6 meter taannaluunniit inorlugu tamakkiisumik takissusilimmik atuisinnaavoq. Tunisinermi pisat annertussusiat ukiumut pisassiissutinit ilanngaaticigineqartassaaq.

§ 23. Angallatit 5 BRT-mit anginerusut inuussutissarsiutigalugu aalisarnermut atorneqartussat Aalisarnermut, Piniarnermut Nunalerinermullu Naalakkersuisoqarfimmit akuerineqartassapput.

Imm. 2. Aalisarnermut, Piniarnermut Nunalerinermullu Naalakkersuisoqarfiup angallatit taamaallaat akuerisinnaavai:

- 1) piginnittuunermut pissutsit tamanna pillugu aalisarnermut inatsimmi aalajangersakkanut naapertuuppata, aamma
- 2) angallatip aalisarsinnaassusia aalisarnissamik periarfissanut atuuttunut naleqqussagaasutut nalilerneqarpat.

Imm. 3. Akuerineqarnissamik qinnuteqaat allaganngorlugu Aalisarnermut, Piniarnermut Nunalerinermullu Naalakkersuisoqarfimmut nassiunneqassaaq.

Imm. 4. Naalagaaffimmi sumi angerlarsimaffeqarnermut uppersarsaatip aammalu usitussutsimut uuttuutit assilinerat qinnuteqaammut ilanngullugit nassiunneqassapput. Angallat nutaamik uuttortarneqarpat, motooria pingaarneq taarserneqarpat imaluunniit annertuumik allanngortinneqarpat usitussutsimut uuttuut nutaq Aalisarnermut, Piniarnermut Nunalerinermullu Pisortaqarfimmut nassiunneqassaaq.

Imm. 5. Angallatip piginnittua, aqqa GR-normualuunniit taarserpat naalagaaffimmi sumi angerlarsimaffeqarnermut uppersarsaammik nutaamik Aalisarnermut, Piniarnermut Nunalerinermullu Pisortaqarfimmut nassiussisoqassaaq.

- 1) Angallatip piginnittua, aqqa GR-normualuunniit taarserpat pisinermut isumaqatigiissut pisisumit tunisumillu atsiorneqarsimasooq naalagaaffimmi sumi angerlarsimaffeqarnermut uppersarsaatip pigineqalernissaata tungaanut uppersarsaataagallartut akuerineqarsinnaavoq.

§ 24. Kinaluunniit § 3, imm. 1, nr. 4 naapertorlugu Kalaallit Nunaata aalisarnikkut oqartussaaffiata avataani inuussutissarsiutigalugu aalisarsinnaanermut akuersissummik pigisaqartoq, nunat tamalaat akornanni aalisarneq pillugu isumaqatigiissutininik aalajangersakkanillu malinninnissamut pisussaaffeqarpoq.

Imm. 2. Isumaqatigiissuteqarfiusuni aalisarnermi angallat nunat tamalaat isumaqatigiissutaat imaluunniit isumaqatigiissutnaapertorlugit misissuiffigineqartussaavoq pineqaatissinneqarlunilu.

Pineqaatissiissutaasinnaasut

§ 25. § 1, imm. 4 aamma 5-imik, § 3, imm. 1 aamma 2-mik, § 4, imm. 1-imik, § 5, imm. 1-imik, § 6, imm. 1-imik, § 7, imm. 4-imik, § 19, imm. 1-imik, § 20-mik, § 21, imm. 2, 4 aamma 5-imik, § 23, imm. 1, 4, oqaaseqatigiit aappaannik, 5-imillu, kiisalu § 24, imm. 1-imik unioqqutitsinerit pinerluttulerineri inatsimmi malittarisassat naapertorlugit akiliisitsissummik arsaarinnissummillu pineqaatissinneqarsinnaapput.

Imm. 2. Aalisarsinnaanermut akuersissummi piumasaqaatinik unioqqutitsineq akuersissutip atorineqarsinnaanerata killiliiffigineqarneranik, kiisalu annertuumik arlaleriarluniluunniit unioqqutitsisoqarnerani arsaarinnissutigineqarneranik kinguneqarsinnaavoq. Aalisarnej pillugu inatsimmi § 21, imm. 4 naapertorlugu tamanna Naalakkersuisunit aalajangerneqassaaq, nalunaarutigineqarnerani illu ullut 15-it qaangiutsinnagit Kalaallit Nunaata Eqqartuussisuuneqarfianut ingerlateqqinneqarsinnaalluni.

Imm. 3. Inatsisilerineri immikkoortut inuttut isigineqarsinnaasut pinerluttulerineri inatsimmi malittarisassat malillugit imm. 1 malillugu akiliisussanngortinneqarsinnaapput.

Imm. 4. Angallatit 75 BRT/-mit imaluunniit 120 BT-mit anginerusut eqqarsaatigalugit imm. 1 aamma 3 malillugit suliasat Kalaallit Nunaanni Eqqartuussivimmut suliarinniffiusussatut siullertut suliasanngortinneqartassapput.

Imm. 5. Akiliisitsissutit imm. 1 aamma 3 malillugit aalajangersarneqartut Nunatta Karsianut nakkartarput.

Atuutilerfia

§ 26. Nalunaarut 2021-mi januaarip ulluisa aallaqqaataanni atuutilerpoq.

Imm. 2. Peqatigitillugu Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat nr. 8, 8. april 2016-imeersoq atuukkunnaarsinneqarpoq.

Namminersorlutik Oqartussat, ulloq 18. december 2020

Jens Immanuelson

/

Jørgen Isak Olsen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut